



BILDU eta EAJ-PNV Udal Taldeek Udal honetako Osoko Bilkurak berea egin dezan honoko mozioa aurkezten dute:

"UDAL EUSKALTEGIEN AUZIA

Udal euskaltegiak azken garai hauetan bizi duten diru murrizketa dela eta Oñatiko Udalak ondorengo adierazpena onartu eta honen berri Jaurlaritzari eta HABEri eman nahi die:

Udal euskaltegiak, azken urte hauetan, diru-laguntza gutxiago jasotzen ari dira. Murrizketak, udal batzuetan handiak izan dira eta udalek, euskaltegi hauen biziraupena ziurtatu nahi dutelako, diru murrizketen zama bere gain hartu behar izan dute. Ondorioz, Udal bakoitzak, udal euskaltegien lana eta jarraipena ere egokitu behar izan du, erabaki propioak hartuz. Epe motzean, murrizketek jarraitzen badute, udal euskaltegien jarraipena arriskuan egon liteke.

Udal euskaltegiak 80. hamarkadan sortu ziren helduen euskalduntze eta alfabetatzea helburu zutelarik. Harrezkero, euskararen normalizazioari laguntzeko (gainontzeko euskaltegiekin batera, AEK, IKA, ...) eta erdaldunak euskarara biltzeko lan asko egin dute.

HABEk lagundu ditu diruz eta ordura arte ez zegoen euskaltegi publikoen sarea sortu zuen. Udalek ere diruz laguntzen dituzte: irakasleriaren kontratazioan, gizarte segurantzaren gastuetan, etab ...

Jaurlaritzaren (PSE) aldaketarekin batera udal euskaltegiak diru-laguntza murrizketak pairatzen hasi ziren. Jokabide honek argi erakusten du Jaurlaritzak gure hizkuntza nazionalarekin zer egin asmo duen eta zein estrategia erabiliko duen. Bere estrategia suntsitzailearekin udal euskaltegiak itoarazi nahi ditu diru-laguntzak murriztuta. Argi dago (PSErentzat) egun zama ekonomikoa direla eta finantziazioaren zama udalen gain utzi nahi dutela. Jaurlaritzak eta HABEK eskuak garbitu nahi dituzte.

Euskaltegien geroa ziurtatzeko, udalei eurei ez dagozkien erantzukizunak hartzera behartu nahi ditu, beste behin ere itoarazi nahi ditu. Udal euskaltegiak izaera publikorekin jaio ziren eta Euskal Herria euskalduntzen jarraitzeko duten erantzukizunagatik publiko izaten jarraitu behar dute eta Jaurlaritzak, oso-osorik, lagundu behar ditu diruz.

Argi dago auzi honetan hizkuntza nazionala euskara dela erdigunean dagoena. Jaurlaritzaren eta PSEren estrategia politikoaren baitan kokatzen den hizkuntza politikari erantzuten diola HABEren diru murrizketak: Euskaltegi publikoen bideragarritasunean duen ardurari uko egin eta hau udalen bizkar utzi nahi izatea, eskaintza publikoa eta sektore publikoaren kaltetan, pribatizazioaren bidea bultzatuz, lanpostu publikoak desagerraraziz.

Ondorioz:

Helduen Euskalduntze eta Alfabetatzean Jaurlaritzak eta HABEK duten ardura garbia da: Udal euskaltegien finantziazioa bere gain hartu behar dute, publikotasuna ziurtatu eta doakotasunaren bidean urratsak eman.

Udalen ardura politikoa, herrietako egoera soziolinguistikoa kontuan izanik, normalizazioa helburu duten egitasmo eta ekintzak sustatzea eta herritarrak laguntzea izan behar du, ez dakitenek euskara ikasi eta euskaldunak alfabetatzea; eta, herrietako eskaintza aztertu eta egokitu ondoren diru-laguntza politika planifikatu.

Tokian tokiko euskalgintza eta eragile politiko eta sozialak bat eginik, euskararen egoerari buruzko eztabaida soziala ireki eta kaleratu behar dugu. Guztion artean euskararen beharra bultzatu eta European euskararen herria berrezarri behar dugu. Euskararen aldeko kontzientziazio eta sensibilizazio lana berpiztu behar dugu hizkuntzaren defentsan indarrak eta ahaleginak bilduz.

Udal euskaltegiek euskalduntze-alfabetatzeari ekarpen handia egin diote eta etorkizunean ere, Euskal Herri euskalduna lortu arte, gainontzeko mugimenduekin elkarlanean (AEK, IKA, ...), aliantzak eta sinergiak bilatuz, erdaldun-euskaltzaleak bildu, saretu eta euskalduntze prozesuan aritzeko bideak bultzatuko dituzte.

Euskal hezkuntza sistemaren barruan helduen euskalduntze-alfabetatzea txertatu behar da eta publikoa eta doakoa izan behar du. Ezin dugu diru murrizketarik onartu eta ezin dugu udal euskaltegi bakar bat ere ixten utzi. Euskaltegi bat ixtea herri bateko eskola bat ixtea bezalaxe da eta hori eskandaluzkoa eta larria litzateke. Onartezina!

Esandakoak gogoan harturik, Udal honek honako adierazpena onartzen du:

- 1.- Udal Euskaltegien inguruan sortu den auzi honen erantzule eta arduradun politikoak Jaurlaritza eta HABE dira. Urtetan zehar udal euskaltegiek egindako lana kontuan izanik hauen etorkizuna arriskuan jartzetik ezin dugu onartu.
- 2.- Udal honetatik Jaurlaritzari eta HABEri behar diren baliabide ekonomiko eta politikoak jartzeko, dagozkien arduraz erantzuteko, eta zama ekonomikoa udalen gain ez uzteko eskatzen diegu.
- 3.-Ezin dugu euskarari eraso txikienik egiten utzi eta onartu. Euskal Herri osoari, eta, bereziki, euskararen aldeko mugimenduari euskararen aurkako erasoei aurre egiteko deia luzatu nahi diegu.
- 4.-Oñatiko Udalak udal euskaltegien auziari ardura politiko osoz eta herritarrekin batera erantzuteko konpromisoa hartzen du, eta helduen euskalduntze-alfabetatzearen mugimenduak atzerapenik izan ez dezan behar diren neurriak hartuko ditu.
- 5.- Erabaki honen berri Jaurlaritzari, HABEri, euskalgintzari eta herri osoari emango zaio eta bakoitzari arduraz jokatzeko eskatzen diogu.

Oñatin, 2012ko Apirila"